



Inatsisartunut ilaasortaq Lars Poulsen, Siumut
Inatsisartut@inatsisartut.gl

Tusass-ip allakkanik poortukkanillu sullissinera pillugu § 37 naapertorlugu apeqquteqaammut 2026-010-mut akissut

Ulloq: 20-02-2026
Suliap nr.: 2026 - 2020
ID. nr.: 79960732

Asasara Lars Poulsen

Allakkanik poortukkanillu sullissineq pillugu Inatsisartut Suleriaasianni § 37 naapertorlugu Naalakkersuisunut apeqquteqarputit. Apeqqutitit uannut akisassanngorlugit innersuunneqarput. Apeqqutit ataasiakkaarlugit matuma kinguliani issuarneqarput, akissut kingornanniilluni.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1. Kiffartuussinermi kikkut nunatsinnut poortukkanik nassiussanut akisussaasuuppat?

Akissut: Allakkat pillugit Inatsisartut inatsisaat tunngavigalugu allakkat poortukkallu Tusass A/S-imit isumagineqarput, poortukat allat niuerfimmi niuerneq tunngavigalugu nassiunneqartartut maleruagassiivigineqarsimanatik.

Apeqqut 2. Sumiiffimmut tikinneranni kiap aasarpai?

Akissut: Apeqqutip akissuteqarfigineqarnissaanut ilassutissanik Ineqarnermut, Attaveqaasersuutitut Isorliunerusunullu Naalakkersuisoqarfik Tusass-imut piniarpoq. Tusass imatut paasissutissiivoq:

"Air Greenland-ip allakkanut puut tikiunneqarneranni Tusass-imut imaluunniit Tusass-ip sullissisuanut, assersuutigalugu Pilersuisumut, Brugsenimut imaluunniit Inussuk-mut (Vectrus) tunniuttarpai."

Apeqqut 3. Poortukat assartorneqarnerminni sumi uninngatinneqartarpat?

Akissut: Apeqqutip akissuteqarfigineqarnissaanut ilassutissanik Ineqarnermut, Attaveqaasersuutitut Isorliunerusunullu Naalakkersuisoqarfik Tusass-imut piniarpoq. Tusass imatut paasissutissiivoq:

"PostNord i Københavnimi PostNordip allakkanik poortukkanillu Air Greenland-imut tunniussineraniit imaluunniit Tusass-ip Kalaallit Nunaata iluani allakkanik tunniussineraniit, illoqarfinni ataasiakkaani Tusass-imut tunniunneqarnissaasa tungaanut Air Greenland-ip nassiussat paarisarpai."

Apeqquut 4. Tigusisussanut aalleqqusinermi attaveqarniarneq qanoq naammassineqartarpa?

Akissut: Apeqqutip akissuteqarfigineqarnissaanut ilassutissanik Ineqarnermut, Attaveqaasersuutitut Isorliunerusunullu Naalakkersuisoqarfik Tusass-imut piniarpoq. Tusass imatut paasissutissiivoq:

" Illoqarfinni:

- *Attaveqarneq pingaarnertigut SMS-ikkut imaluunniit e-mail-ikkut digitalimik ingerlanneqarpoq*
- *Aamma aallernissaq pillugu pappialamut allallugu nalunaarutinik ikinnerusunik nassiussisoqartarpoq*
- *Allakkat annikinnerusut illoqarfiit amerlanersaanni suli agguanneqartarput*
- *Illoqarfinni annerusuni allakkat poortukkallu suliffeqarfinnut inuussutissarsiutigalugu tunniussinissamik pisisimasunut tunniunneqartarput*

Inoqarfinni minnerusuni:

- *Allakkat poortukkallu Pilersuisup pisiniarfiinut aaneqartarput"*

Apeqquut 5. Piffissamik sivilisungaaitsiartumik nassiussanik agguasaarnermut ajornartorsiut aqqinniarlugu tusass susassaqtartullu qanoq pilersaaruteqarpat?

Akissut Apeqqutip akissuteqarfigineqarnissaanut ilassutissanik Ineqarnermut, Attaveqaasersuutitut Isorliunerusunullu Naalakkersuisoqarfik Tusass-imut piniarpoq. Tusass imatut paasissutissiivoq:

"Tusass-ip paasissutissiissutigisinnaavaa, allakkanik/poortukkanik nassiutassanik tunniussinermiit tigusisussamut tunniussinermut piffissami tamarmiusumi pingaartumik assartorneqarnerpiaat sivilisusarpoq.

Boksinik tunniussisarfinnik, Aallertarfik, Tusass-ip atuutsitsilernerata kingorna – 2026-mi allakkat imaluunniit poortukkat 262.000-it missai Aallertarfik aqutigalugu tunniunneqarput – nassiussat 50 %-iisa missai digitalimik nalunaarutip nassiunneqarnerata kingorna nalunaaquttap akunnerisa 0-4 iluanni aaneqartarput aammalu 71 %-ii nalunaaquttap akunnerisa 24-t iluanni aaneqartarlutik.

Tasiilami, Maniitsumi aamma Brugseni Natalie-mi Nuummi boksit tunniussisarfiiit arlallit Tusass-ip 2025-mi atuutsilersippai. Sumiiffinni Tusass-ip 2023 – 2025-mi nammineq pisiniarfitsinniit allakkerivinnut avataaniittunut nuutitsiffigisaanni tamaginni tamanna ammasarfiit sivilisunerunerat pissutigalugu tikikkuminarnerulersitsinermik malitseqarsimavoq.

Assartuussisartuni anigorniagassat uteqattaartuartut pillugit Tusass-ip Air Greenland aamma PostNord ingerlaavartumik oqaloqatigisarpaa aammalu DAO-p Danmarkimi allakkanik katersisarnermik agguasaarnermillu tigusinernut atatillugu DAO attaveqarfigisimallugu. Imarpikkoortumik timmisartumik allakkanut Tusass toqqaannartumik

sunniuteqanngilaq, tassami assartuussineq PostNord-ip aamma Air Greenland-ip akornanni namminersorluni nassiussanik assartuussinissamut isumaqatigiissutikkoortumik pisarmat. Aallartussani ataasiakkaani inissaqartitsineq aalajangersimasuuvoq. Taamaatitsinerit, teknikkinut tunngasut imaluunniit ilaasut amerliartorsimaneri allakkat kinguaattoornerannik malitseqartussaapput.

Piffissani allakkat Københavnimi uninngasut amerliartuinnarneranni, Air Greenland timmisartumi imarpikkoortumi inissamik annertunerusumik neqerooruteqarsinnaatinnagu, allakkat timmisartumik nassiunneqartussat Københavnimiit kinguaattoortussaapput. Allakkat aninertunerusut Nuummut tikiunneqarneranni, tamatuma kingorna aamma tamanna inissaqartitsineri anigorniagassaqaqartitsilertussaavoq aammalu illoqarfinnut, taamaalillunilu inoqarfinnut minnerusunut ingerlaqqittussat, Nuummiit kinguaattoortussaallutik.

Kalaallit Nunaata iluani namminersortunut kiffartuussinissamullu isumaqatigiissutit, Naalakkersuisut aamma assartuussisartut akornanni isumaqatigiissutigineqartut, Tusass-ip pinngitsoorsinnaanngilai. Tassani ilaasut, allakkat nassiussat taaneqartutut tulleriinnilerlugit pingaarnersiorneqartarput. Allakkat inissaqartinneqanngippata, isumaqatigiissutini assartuussisartut immikkut timmisartuussinissamik pisussaaffilerneqanngillat, kisianni sivilunerusumik uninngasut amerliartorsimatillugit Air Greenland suliaqarnermi akuttunngitsumik immikkut timmisartumi inissamik atugassiisartoq, Tusass-ip ilisimaaraa."

Apeqqut 6. Siviiumik utaqqisarneq ajornartorsiut pillugu innuttaasuniik Naalakkersuisunut naammagittaalliuutinik apuussisoqarnikuua? Qassit apuussaqaqarnikuuppat?

Akissut: Ineqarnermut, Attaveqaasersuutitut Isorliunerusunullu Naalakkersuisoqarfiup allagaataannik misissuineri, piffissami 1. september 2025 – 31. januar 2026 arriippallaamik poortukkanik tunniussisarneq pillugu, taamaattoq nassiussanik assartuussinermut tunngassuteqartoq, naammagittaalliuut ataasiinnaq tiguneqarsimavoq. Naammagittaalliuutit Tusass-imut ingerlatinneqartarnerat tamatumunnga pissutaasoq ilimanarpoq.

Tamatuma saniatigut Tusass imatut paasisutissiivoq:


"Innuttaasuniit naammagittaalliuutit apeqqutillinerillu ingerlaavartumik tiguneqartarput. Piffissap ingerlanerani amerlassusai allanngorarpot, aammalu piffissat ilaanni saaffiginnittut malunnaatilimmik amerlanerusarput. Timmisartut qulimiguullillu ingerlanneqarnerisa akornuteqarnerini piffissami naammagittaalliuutit amerlanerukkajuttarput.

Apeqqutillinerit imaluunniit naammagittaalliuutit tamakkiisumik amerlassusaannik imaluunniit suussusaannik agguataarinernik Tusass soqanngilaq, tassami saaffiginninnerit oqaasiinnartigut imaluunniit allaganngorlugit pisinnaasarmata, taakkualu qitiusumi imaluunniit najukkani allakkerivinni tiguneqartarlutik.

*Naggasiutigalugu qulequtaq taanna pillugu § 37 naapertorlugu
apeqquteqaammut nr. 229-2025-mut akissut, annertunerpaatigut
tunngavigisinnaasarpur, Tusass-ip innersuussutigissavaa."*

Neriuutigaara matuma siulianiittuni apeqqutitit akineqarsimassasut.

Inussiarnersumik inuulluaqqusillunga



Aqqaluaq B. Egede